

欽
定
全
唐
文

欽定全唐文卷四十六目錄

新文藝出版社藏書

代宗一

授奉節郡王适天下兵馬元帥制

加李輔國司空兼中書令兵部尚書食實封制

終喪制

加李光弼實封仍與一子官三品制

授劉晏吏部尚書平章事制

封衛伯玉城陽郡王制

增修學館制

賜劉希暹自盡制

許巴南賊自新制

淮南旱求言制

加馬璘實封制

追封華陽公主制

追封玉虛公主制

貶王縉括州刺史制

授楊綰中書侍郎常衮門下侍郎並同中書門下

平章事制

贈李進禮部尚書制

封辛京杲晉昌郡王制

答郭子儀進詔勅詔

命僕固懷恩充朔方行營節度使詔

嚴薦舉詔

流裴莪費州詔

削除來瑱官爵詔

禁僧尼道士往來聚會詔

禁斷公私借寺觀居止詔

令舉堪任刺史縣令判司丞尉詔

令京兆府收埋骸骨詔

答宰臣等請立皇太子手詔

答郭子儀等表請改元立號手詔

答郭子儀等表請改元立號第二手詔

答郭子儀等表請改元立號第三手詔

令行在側近府州搜舉遺逸詔

長流程元振詔

答雍王讓皇太子詔

答王縉進王維集表詔

遣劉晏宣慰諸道詔

求言詔

諭僕固懷恩詔

答李光弼讓實封詔

答郭子儀陳讓太尉手詔

答郭子儀讓尚書令手詔

答王縉讓侍中郡公第一表手詔

答王縉讓侍中郡公第二表手詔

許王縉讓侍中郡公手詔

贈李氏裴氏縣君詔

緣汴河置防援詔

答魚朝恩獻苑內白鹿白兔手詔

贈韋陟尚書左僕射詔

答劉晏讓官手詔

減租稅詔

均濟職田俸料詔

給復同華兩州詔

升侍中中書令入正二品門下中書侍郎入正三
品詔

欽定全唐文卷四十六

代宗皇帝

帝諱豫肅宗長子開元十四年生初名俶年十五封廣平王至德二年進封楚王乾元元年改封成王四月冊爲皇太子改今名寶應元年四月即位二年上尊號寶應元聖文武孝皇帝在位十八年年五十三諡曰睿文孝武皇帝廟號代宗

授奉節郡王适天下兵馬元帥制

門下國之大事戎寄爲先朝有舊章親賢是屬故求諸必

當用制於中權存以至公豈慚於內舉特進奉節郡王适
天資淳懿夙表岐嶷深謀祕略可謂生知樂善近仁非由
外獎檢身以禮率性惟忠將有事於四方且申爾志俾啟
行於十乘式佇其能故可敬慎厥猷勤宣乃力克奉君親
之命載清寇孽之餘允副僉諧宜從茲授可天下兵馬元
帥餘如故

加李輔國司空兼中書令兵部尚書食實封制

論道之官兼平水土神化之本皆屬陶鈞仗以勲賢執茲
大政開府儀同三司行兵部尚書判元帥行軍司馬閑廐

等使上柱國尚父李輔國先聖同德皇家保衡經綸雲雷
負揭日月佐命之義格於蒼穹親必造膝言皆投水功高
彌損任重不矜芟夷內難義形於色姦邪黜伏宗社獲安
大厦再崇九鼎增重肆予小子繼守萬方頃以寡薄賴於
營救巖廊是倚舟楫可乘且名冠雲臺未登公輔績參天
造猶缺苴茅久遂推挹恐乖彝典朝廷百辟屢進昌言乃
申弼亮之謨式副羣公之請主茲空土拜以專車更誓山
河用加井賦宜俞往諧之命永叶褒優之禮可司空兼中
書令兵部尚書食實封八百戶

終喪制

三年之喪天下達禮苟或變革何以教人朕邁茲閔凶攀號罔極公卿固請俾聽朝務斬焉縗經痛貫心靈豈可便議公除遽移諒闇昨見所司儀注今月十三日大祥十五日從吉仰憑遺制又欲抑予竊惟哀思深謂未可其百寮並以此釋服朕將繼武丁之道素冠之詩恭默再周不忍權奪凡庶在位宜悉哀懷

加李光弼實封仍與一子官三品制

功崇望重加以服章德厚流光延其懋賞爰益苴茅之典

並明幹蠱之才副元帥太尉兼侍中都知河南淮南淮西
山南東道諸節度行營事上柱國臨淮郡王李光弼元勲
濟代公輔推賢宣大化之神明總專征之師律自出征移
鎮距海負河連率百城旌旗千里東郊誓衆雅繼魯侯之
功北伐擁旄首稱漢將之略高牙罷設重鼎斯調尤知武
庫之寶實在雲臺之右疇其眞食美以保家僉議永諧舊
章斯舉敬哉有土更載丹書之盟鯉也趨庭宜升紫綬之
寵可加食實封二百戶仍與一子官階三品餘並如故

授劉晏吏部尚書平章事制

構廣廈者審象於宏材經萬邦者注意於良弼自非道符
夢卜名冠簪裾何以永副虛求式諧時望銀青光祿大夫
國子祭酒兼御史大夫京兆尹判度支充勾當度支等使
上柱國彭城縣開國伯劉晏應期生德維嶽降賢文爲君
子之儒器蘊通人之量學苞前典志在於直方詞蔚古風
義存於比興自兼京劇職總均輸變而能通宏適時之務
居難若易多濟物之心頃者戎事方殷軍賦惟錯率皆倚
辦每務推誠寇難初夷皇猷咨弼周王佐國必自於天官
漢代登台咸由於亞相宜應選衆之舉用成亮采之功可

金紫光祿大夫吏部尚書平章事勲及度支等使並如故
封衛伯玉城陽郡王制

門下建爾茅社所以親諸侯加以金紫所以封異姓蓋章
敘之舊制必選功而茂賞開府儀同三司檢校工部尚書
兼江陵尹御史大夫充荆南節度觀察處置等使上柱國
芮國公衛伯玉性與宏毅識資沖遠公直不撓智謀尤深
忠厚可移文武是憲幼讀墳典素知名於國庠晚藉韜鈴
因効策於戎幕累膺將帥之重積有艱鉅之勲竭力事邊
乃誠王室伏波料敵每合我心司馬理軍差強人意自荆

門作鎮式是南邦九江孔殷三楚之會澄清節制實得專
征而謀求政理開示恩信既愛人而省刑將息馬以論道
寬而有制令協於師貞簡則易從風行於刺舉疆事寧晏
厥功茂焉二等之榮允茲馭貴宜錫褒封之命俾光優異
之禮可封城陽郡王食邑三千戶餘並如故

增修學館制

治道同歸師氏爲上化人成俗必務於學俊造之士皆從
此途國之貴遊罔不受業修文行忠信之教崇祗庸孝友
之德盡其師道乃謂成人然後揚於王庭敷以政事徵之

以理任之以官寘於周行莫匪邦彥樂得賢也其在茲乎
朕志承理體尤重儒術先王設教敢不虔行頃以戎狄多
虞急於經略太學空設諸生蓋寡絃誦之地寂寥無聲函
丈之閒殆將不掃上庠及此甚用閔焉今寓縣又寧文武
並備方投戈而講藝俾釋菜而爲禮一作俾釋
未以行禮使四科咸
進六藝復興神人以和風化浸美日用此道將無閒然其
諸道節度觀察都防禦等使朕之腹心久鎮方面眷其子
弟爲奉義方修德立身是資藝業恐干戈之後學校尚微
僻居遠方無所咨稟山東寡問質疑必就於馬融關西盛

名尊儒乃稱於楊震負經來學宜集京師其宰相朝官及
神策六軍諸將子弟欲得習學者自今已後並令補國子
學生欲其業重竄金器成琢玉日新厥德代不乏賢其中
身雖有官欲附學讀書者亦聽其學官委中書門下選行
業堪爲師範者充其學生員數多少所習經業考試等并
所供糧料及緣學館破壞要量事修理各委本司條件聞
奏務須詳悉稱朕意焉

賜劉希暹自盡制

勅合體者君臣之分二心者天地同誅構茲亂階與衆共

棄開府儀同三司行太僕卿兼御史中丞神策軍兵馬都
虞候淄川郡王劉希暹幸以微謬關榮秩典司禁戎作我
心膂外雖承命內不盡忠泄漏朕言幾危吾事念常任使
冀以自新分委戎柄授之經略而干冒貨賂谿壑無厭恣
以苛刻師人積怨輒懷顧望潛蓄異圖假談咎徵上悖天
理誘吾忠良之士妄言禍亂之端惡狀已彰情在難恕賴
勲賢竭力沮發奸兇遂命公卿兼之法吏再三訊鞠情款
昭然戮尸市朝未云塞責釐纓盤水尚許歸全特從寬典
宜使自盡朕臨馭萬邦於茲九稔每以外攘夷狄未戢干

戈常亦推食解衣躬撫將校義均休戚期保終始明神所知誠契未負禁網踈濶小過必遺豈虞奸臣有此干紀罪成惡稔以寘嚴科天下之法不可私也刑其無捨良用憮然文武庶寮宜悉朕意

許巴南賊自新制

巴南諸州仍歲水旱迫於凍餒或至流離因有剽竊苟全性命懼刑網之所及姑嘯聚以相依抑有繇焉蓋非獲已永言其弊用軫於懷如能相率來歸各安生業並無所問咸許自新宣示中外咸使知悉

淮南旱求言制

淮南數州夏秋無雨朕精誠奉天誠懼臨下唯恐明有所
不照聽有所不達百辟卿士咸弼予違宣示百姓令知朕
意

加馬璘實封制

勅大將在外勤勞有功或未進秩必當加賦更書侯社益
茂朝章四鎮北庭行軍兼涇原等州節度使開府儀同三
司檢校工部尚書兼御史大夫上柱國扶風郡王馬璘以
牧人御衆之才膺方叔召虎之任理事詰禁以屏西郊撫

和其人一乃心力智謀濬發忠義侃然武能用典師在制
命紀逖伐叛服柔示懷懲密人之不恭執戎予以數罪務
於禮德以濟威刑關右寧謐賴其鎮定社稷之衛予嘉乃
勲厚其田租式寵戎閫可加實封二百戶餘如故

追封華陽公主制

周漢之儀湯沐之制車服次於王后容衛榮於戚藩其淑
德竟夭於茂年成禮未主於同姓則加其懋榮舉於前典
是以東漢追平原之封西晉崇宸獻之命故第五公主天
縱柔和性成聰敏爰自辨識秀於人倫仁義切於衷誠怡

順適於師訓先意承旨不待明言省醴適饌每加豐潔送
迎匪憚於寒暑溫扇無待於傍人甘去繁奢樂聞禮教將
有詞請必候溫顏或遇憂勞輒形焦色周旋六行諷詠七
篇霽威怒以拯危伺歡愉而進善常求惠下聚請求賢而
齟齬之辰清羸多疾沈綿衽席彌厯紀年針艾嬰身藥餌
在口異在殊常之命實有兼愛之慈與之名都假以榮號
闕築館之盛乃從受邑之期優典未彰幼齡已謝追懷旣
往痛悼滋深方展禮於舊章稍申哀於備物叶子素志厚
爾飾終可追封華陽公主

追封玉虛公主制

因親之愛存則均慈緣情之禮歿而逾厚故第六公主敏
識沖和韶姿婉秀純孝之性自合於天經柔順之心夙成
於閭則動惟中禮言必知微承夙烈之元風悟道家之真
籙方開魯館甫往有行未啟漢封遽幽長往念其早夭倍
軫哀情用追湯沐之榮載錫靈仙之號可追封玉虛公主
貶王縉括州刺史制

門下侍郎同中書門下平章事王縉附會姦邪阿諛讒佞
據茲犯狀罪至難捨矜以耄及未忍加刑俾申屈法之恩

貸以岳牧之秩可使持節括州諸軍事守括州刺史宜即
赴任於戲朕恭己南面推誠股肱敷求哲人將弼予理昧
於任使過在朕躬無曠厥官各慎厥職

授楊綰中書侍郎常袞門下侍郎並同中書門下

平章事制

體國經務亮采惠疇以遂萬物之宜以刑四方之禮彌縫
袞職金玉王猷平景緯於台階濟鹽梅於鼎鼐必先時俊
允膺旁求朝議大夫守太常卿兼修國史賜紫金魚袋楊
綰瞻學懿文崇德廣業表微藏用適務知章朝議郎守尚

書禮部侍郎集賢院學士上柱國賜紫金魚袋常袞志業
貞諒理識宏深守正居中確乎難奪頃以戎車未戢方事
仍殷永言庶政有乖彝敘今將本俗刑教澄源振綱宣九
德以阜成張四維而翼贊洽於僉論咨爾具瞻往副審象
之誠懋緝時雍之化綰可中書侍郎同中書門下平章事
集賢殿崇文館大學士修國史散官勲賜如故袞可門下
侍郎同中書門下平章事太清太微宮使崇文宏文館大
學士散官勲賜如故

贈李進禮部尚書制

朕在藩邸理兵西夏建於元子受律東郊時更否泰再同
休戚可贈禮部尚書

封辛京杲晉昌郡王制

門下關內河東副元帥左廂兵馬使同朔方節度副使開
府儀同三司試太常卿兼御史中丞上柱國庸國公京杲
文武成器公忠立節副旌麾於戎閫戒士馬於轅門縱橫
有謀沈毅多勇守能重固戰必先登宏變通以制用崇取
勝之嘉績勤王憂國歷險不渝奉職在公始終無替封建
之制率由舊章以功詔爵議賞從重宜分茅於二等俾有

國於千乘可封晉昌郡王食邑三千戶

答郭子儀進詔勅詔

朕不德不明俾大臣憂疑朕之過也朕甚自愧公勿以爲慮

命僕固懷恩充朔方行營節度使詔

工部尚書兼御史大夫隴右節度觀察等使大寧郡王僕固懷恩經武大才濟時良具今以寇窘河雒思用討除宜輟務於西陲俾廓清於東夏可充朔方行營節度使本官封如故

嚴薦舉詔

推薦之道必務於至公賞罰之間亦資於不濫其諸色舉人等須有處分令薦所知實佇才能用施政理自宜慎擇以副虛懷古者效官三歲考績善惡既著褒貶斯存舉之得人必受旌能之賞舉之失選亦加懲過之罰賞罰之典期於必行凡百具僚宜知朕意

流裴茂費州詔

前襄州刺史裴茂性本頑疎行惟狂悖頃因試用爰委軍戎守在要衝無聞方略所以申命來瑱重撫漢南即宜奔

赴闕廷謝其曠職而乃顧惜名位輕圖異端誣構忠良妄興兵甲遽令追召敢欲逗留是有無君之心不唯罔上之罪又轉輸之物軍國所資擅爲費用其數甚廣據其抵犯合寘嚴誅但自朕登極已來屢施恩宥肆諸朝市所未忍爲宜寬殊死之刑俾就投荒之謫宜除名長流費州

削除來瑱官爵詔

春秋之義貴在於必書君臣之間法存於無赦沮勸式遵於前典進退莫非於至公惡稔旣彰明罰難貸開府儀同三司行兵部尚書中書門下平章事充山南東道節度觀

察處置等使上柱國潁國公來瑱謬當任用素乏器能亟
歷班榮累經節制莅職蔑聞於成績登朝虛美於崇名頃
者分閫頒條久淹江漢或頻徵不至或移鎮遲留實乖堂
陛之儀爰及干戈之念朕以舊臣宿將道在含宏會其來
庭用甄後效超登宰輔光拜夏卿列在三台掩其一眚山
陵先遠事委近臣謀謨素闕於大猷卜祝頗聞於私議實
虧周慎且聞樞言何以輔弼鼎司儀刑簪紱據其所犯合
寘殊科以嘗侍軒闥用存寬免之辜緬範舊章兼膺黜削
之譴其身官爵一切削除

禁僧尼道士往來聚會詔

教宗清淨禮避嫌疑其僧尼道士非本師教主及齋會禮謁不得妄託事故輒有往來非時聚會並委所繇官長勾當所有犯者準法處分亦不得因茲攪擾分明告示咸使知悉

禁斷公私借寺觀居止詔

道釋二教用存善誘至於像設必在尊崇如聞州縣公私多借寺觀居止因茲褻黷切宜禁斷務令清肅其寺觀除三綱并老病不能支持者餘並仰每日二時行道禮拜如

有弛慢並量加科罰

令舉堪任刺史縣令判司丞尉詔

知人則哲堯舜猶難類能而舉古今常式自頃中原多故
汔未小康州縣屢空守宰多闕攝官承乏者頗無舉職之
能懷才抱器者或有後時之嘆朕所以宵夜不寐側席未
遑思宏政理之規冀及大中之道而庶尹卿士列於朝廷
豈無協贊之心以助旁求之義其内外文武官中如有堪
任刺史縣令及出身前資人中有堪任判司丞尉者宜令
京常參官各慎擇所知具狀奏聞諸州刺史縣令既藉寮

屬亦宜準此古者得人受賞曾不踰時增秩賜金有國通
典其或任非稱職舉不當才顧多附下之心非無不適之
罰其所舉人授官後如政能尤異清白著聞三兩考後仰
本道觀察使具狀奏聞其舉主及所舉官人並量加進改
如懦弱不舉及暴政處置乖宜並冒犯賊私等議罪論刑
當亦連坐宣示中外知朕意焉

令京兆府收埋骸骨詔

凡在生靈合登仁壽自逢艱阻多致傷殘或寇盜爲災斃
於鋒鏑或歲時不稔道殣相望枯骨轉屍多未埋瘞朕爲

人父母良深憫惻將何以示掩骼之禮昭葬骨之仁永念前修豈忘古訓其京城內外應有舊骸骨宜令京兆府即勾當收拾埋瘞仍令中使與所由計會致祭

答宰臣等請立皇太子手詔

卿等謨明廟堂夾輔王室請正長嫡以崇儲副稱元良之貞固天下之本此調主鬯誠哉是言但以黎庶不康甲兵久頓憂勞旰食姑務息人與衆共守斯爲急務冊命之禮輟而未行方俟有年用申盛典高秋元月平秩不遙因其萬物之成繼以重離之照子孫逢吉是謂大同佇至此時

依卿所請宜悉朕懷

答郭子儀等表請改元立號手詔

朕嗣守洪名欽承丕構克清多難奄旬四方聖靈在天元德數佑南面恭已朕何有焉巨猾削平非予之武言念海內生人至艱兵鋒猶虞暴骨未掩日旰忘食宵分疚懷遽稱成功良謂虛美元官甫畢豈宜即及改元寶位至尊何以更言加號宰臣之任職在輔弼勸進之詞深所不取

答郭子儀等表請改元立號第二手詔

朕內省德薄在於人上紹高祖太宗之天下承上皇先聖

之丕業惕然南面常懼君難豈因樂推亦自光大況山陵
甫爾濡露增懷寓縣凋殘薰風未暢遽行古制虛受鴻名
是用繹思未宜獻可五始之義誠在體元三年之道取其
無改所陳徽號亦有舊章若更尊崇得非自聖股肱輔弼
惟欲致君空勤誠請之詞未副昌言之理

答郭子儀等表請改元立號第三手詔

年叶五紀成歲以授時君臨萬邦向明而聽政體元不潤
其色處實不爲其賓朕若昔大猷允懷恭己務於簡易豈
曰崇高常深負荷之憂敢忘祖宗之烈卿等總括羣議昭

升舊章周爰典籍之文鉤校天人之理對揚耿命進勸皇圖請踰年而改元益正位以加號敢廢春秋之義用諧啟沃之心敬允乃誠良多慚德

令行在側近府州搜舉遺逸詔

理道同歸求賢是急非人不乂辟士是勤招以弓車設其壇席且優邁軸如待神明朕臨御多方誕敷至化慮遺巖穴載佇雲津知白珩之非寶降元纁於下體一自鳴鑿關外駐驛陝郊每念明敷深勞寤寐聽正言以蘇國疾思碩德以定人訛而猶高士鴻冥幽人豹隱將朕之不德而禮

或有遺望干旄之忠告仰少微以嘆息眇然惕勵顧覽河山藿食薇歌往而不返永懷賢者朕甚慙焉今將意達巢居誠通卜兆一麾必起四皓爰來敦其素風成我王道宜令行在側近府州長官搜舉遺逸其有懷才抱器高蹈不仕精加訪擇必以名薦仍須以禮資遣送赴行在賁於邱園待以郎署務令申勸悉朕意焉

長流程元振詔

族談錯立法尚不容同惡陰謀議當從重有一於此情實難原程元振性惟凶愎質本庸愚蕞爾之身合當萬死頃

金史卷之五
以寬其嚴典念以微勞屈法伸恩放歸田里仍乖克己尚
未知非既忘含煦之仁別貯覬覦之望敢爲嘯聚仍欲動
搖不令之臣共爲睥睨妄談休咎仍懷怨望東兵裹甲變
服潛行罔顧君親將圖不軌按驗皆是無所逃刑首足異
門未云塞責朕猶不忘薄效再捨罪人特寬斧鉞之誅俾
正投荒之典宜長流溱州百姓委京兆府差綱遞送路次
州縣差人防援至彼捉搦勿許東西縱有非常之赦不在
會恩之限凡百寮庶宜體朕懷

答雍王讓皇太子詔

立嫡以長繼統惟賢三代成規百王令典惟爾元子敬而
溫文孝叶天經學深義府克奉趨庭之訓遂成麟趾之才
頃總元戎式平巨猾外蕃受律羣帥叶謀咸推兔苑之賢
允副龍樓之拜宜膺德舉勿用勞謙

答王縉進王維集表詔

卿之伯氏天下文宗位歷先朝名高希代抗行周雅長揖
楚詞調六氣於終篇正五音於逸韻泉飛藻思雲散襟情
詩家者流時論歸美誦於人口久鬱文房譌以國風宜登
樂府盱朝之後乙夜將觀石室所藏歿而不朽柏梁之會

今也則亡乃眷棣華克成編錄聲猷益茂歎息良深

遣劉晏宣慰諸道詔

歲之不易征賦繁興河南蕭然江外尤劇供上都之國用
給諸道之軍須庶務徵求未遑小息火耕水耨夏葛冬裘
充饋運而屢空支戎衣而不足農人少而轉困編戶流而
罕歸自北之化未淳大東之詞方切君爲心也朕甚痛焉
今區宇漸寧凋殘已甚惕然恭己姑務息人懼惇嫠之無
告思省方以親問時邁未可日是增勞載懷鴻鴈之詩用
解吾人之愠必資循行悉以周爰皇皇者華申諭朕志宜

令太子賓客兼御史大夫劉晏往諸道宣慰應百姓有徵
科煩重人戶逃亡及水旱所損不能支濟者並與本道節
度使計會蠲削安存逐便處置訖具狀聞奏官吏之政在
邦必聞知無不爲公道斯在其租庸使及刺史縣令錄事
參軍有精於政理及賦役均平州縣之間稱爲良吏者具
名聞奏別有甄異如或殘忍慢法貪汙敗官有害於人不
應時務者亦具狀以聞仍與本道觀察節度使會計舉按
四海至廣九重至深思使下情上通嘗令上旨下達務以
審慎稱朕意焉

求言詔

爲政者宣之使言作事者稽之於衆切於求道務以從人
將明目而達聰亦理煩而去惑經國之體庶無關言文武
百官及諸色人等有論時政得失上封事者狀出後宜令
左右僕射尚書及左右丞諸司侍郎御史大夫中丞等於
尚書省詳議可否具狀聞奏其所上封事除常參官外有
時辭理可觀或幹能堪用者亦宜具言詳議官中或見不
同者即任別狀奏聞

諭僕固懷恩詔

佐命大臣自天所授納於將相委以腹心休戚實同始終
無易太保兼中書令靈州大都督府長史單于鎮北副大
都護充朔方節度關內支度營田鹽池押諸蕃部落副大
使知節度事六城水運使兼河北副元帥上柱國大寧郡
王懷恩朕之元輔上帝賚予道備五才能包三傑長策制
敵精誠感神夙奉先朝志平多難援旗朔野扈蹕岐山前
驅啟行所指皆克收關河之襟帶復都邑之衣冠以義斷
恩毀家徇國躬擐甲胄驅馳十年遇戰則酣逢堅必脆總
統戎旅通和夷狄決策東向殲厥渠魁掃清妖氛芟薶逋

梗海隅萬里一舉蕩平遂欲息馬投戈坐而論道當朝大
政並以咨之聽賡載之歌爲千古之式移軍汾上方欲凱
旋疑隙之端構於羣小浮言初起且以強大自嫌邪說又
生或謂功高不賞以茲淹恤因而沈猜撫之若驚諭之未
解朕以白日旌信明神鑒心若有負功臣是大欺天下爲
人君者豈有此乎尋聞聚族而謀知欲垂橐入覲其子猶
懷反側更有遷延少年輕佻操履非正私庭跋扈違背君
親朔方義師心如父子怒其懷貳遂共梟懸凶子旣誅大
軍方擾倉皇奔竄遠在邊州察其深衷本無他志蓋緣憂

懼遂至於斯眷念之下無忘鑒寐況勲書盟府像列雲臺
錄功念勞豈以小而累大君臣之義情實如初厚祿榮班
固宜仍舊但以河北諸將自竭忠誠朔方三軍已有管屬
不可更置統領復爲節制其先任靈州都督府長史單于
鎮北副大都護及河北副元帥朔方節度等使宜並停其
太保兼中書令上柱國大寧郡王並如故但當詣闕更復
何疑再三言提庶早牽復欲令方寸懸示萬邦爾無我虞
朕言不再久勞於外終必無成收之桑榆殊未爲晚甘言
之誘王者不爲危而悔之將何及矣切令宣示遠副朕懷

答李光弼讓實封詔

爵土之封以酬勲德故受之者適當其分使賞在必行而得之者不讓其餘使人有可繼國之彛憲在乎至公往者寇逆亂常京闕失守太尉兼侍中充河南副元帥都知河南淮西山南東道諸節度行營事上柱國臨淮郡王光弼首奉師律翊佐先朝克殄氛祲底寧宗社自朕續承丕緒又置大功扶顛履危勤恤於外可謂忠存王室道濟生人則食邑所加抑惟常典小因疾故遽有懇詞不伐茂勲請歸實食覽其章奏增用惘然且福壽之理期於勿藥并賦

之錫傳於無窮豈宜暫以微瘵便思獨善將使在其下者何顏受封用阻深誠蓋存大體然謙撝有素志義可嘉足以激厲名節光昭退讓宣示中外咸使聞知

答郭子儀陳讓太尉手詔

卿秉德資忠懿文經武內凝庶績外定羣凶爲社稷之元勲實台陞之良輔爰昇太尉以冠百寮六府益明九鼎增重而懇守沖讓至於再三確乎丹誠貫彼白日范宣辭位馮異不言雖成功而勿居固時望而無易用旌懇至俯遂乃懷所讓者依

答郭子儀讓尚書令手詔

優崇之命所以報功總領之司期於賦政卿入居台鉉出
統戎旃爰自先朝累匡多難靖羣氛於海表凝庶績於天
階敏事而寡言居敬而行簡人難其易爾易其難所以命
掌六聯首茲百辟顧循時議僉謂允諧而累拜封章懇懷
讓挹守淳素之道語政理之源無待禮成曲從德讓宜宣
示於外編之史冊

答王縉讓侍中郡公第一表手詔

卿道高王佐才茂國楨敘百揆於中台調四時於元氣乃

眷東夏至於海隅爰咨相府之謀出總兵車之會受彼師
律主其載書禮有優崇昭茲寵命黃樞受秩元社加封咸
重分麾俾光推轂用申彝典何至勞謙即斷來表

答王縉讓侍中郡公第二表手詔

常伯之任元戎之權自非大臣孰允僉望齊梁郡國淮楚
方隅必資相府之賢式統軍司之務爰從益邑懋厥官常
朝典已行何至固讓即斷來表

許王縉讓侍中郡公手詔

以卿叶宣廟謀綱統戎律軍國大務咸以咨之禮命優崇

古今通制爰進珥貂之秩用加書社之封累表陳情固辭
寵數言多激切志益堅貞雖尚德任賢務於褒進而勞謙
退讓宜有允從暫紓所懷俯順誠情所讓侍中郡公者宜
依

贈李氏裴氏縣君詔

鄭州原武尉盧甫亡妻李氏汴州尉氏王泛妻裴氏等
懿範傳家柔明植性頃因寇難克彰義烈或請代父死表
因心之孝或誓逐夫亡標難奪之節宜膺贈飾俾光休美
李氏可贈孝昌縣君裴氏贈河南縣君仍編入史冊瀾渤

亦贈官秩

緣汴河置防援詔

如聞自東都至淮泗緣汴河州縣自經寇難百姓彫殘地濶人稀多有盜賊漕運商旅不免艱虞宜委王縉各與本道節度計會商量夾河兩岸每兩驛置防援三百人給側近良沃田令其營種分界捉搦

答魚朝恩獻苑內白鹿白兔手詔

白鹿白兔王者嘉瑞和平之應朕以寡德詎敢當焉卿及將士等務切軍儲克勤農畝上元眷祐爰獲禎符所請付

史館者依

贈韋陟尚書左僕射詔

竭忠之臣歿不廢命奉上之節行固無私言念飾終抑惟
恒典故金紫光祿大夫吏部尚書兼御史大夫充東京留
守兼判留司尚書省事東京畿觀察處置使上柱國郇國
公韋陟敦敏直方端嚴峻整宏敷典禮表正人倫學冠通
儒文合大雅頃者詢謀舊德保釐成周眷彼郊圻資其慎
固而兇胡殘醜密邇河洛命居陝虢時俟翦除纔加喉舌
之榮遽嬰霜露之疾方期克享眉壽冀其有瘳奄此殂歿

良深震悼升車而復以申三禭之恩在牖加紳宜崇八座之寵可贈尚書左僕射

答劉晏讓官手詔

卿蘊經國之文懷濟時之略軍儲是切轉運攸難勵以公勤適於通變遠䟽溝洫績顯京坻爰獎勤勞是明賞勸俾遷六職兼綜九流益用撝謙切陳懇讓宜從雅旨所請者依

減租稅詔

古者量其國用而立稅典必於經費由之重輕公田之籍

可謂通制履畝而稅斯誠弊法所期折中以便於時億兆不康君孰與足故愛人之體先以博施富國之源必均節用朕自臨宸極比屬艱難嘗欲闡淳樸之風守沖儉之道每念黎庶思致和平而邊事猶殷戎車屢駕軍興取給皆出邦畿九伐之師尚勤王略千金之費重困吾人乃者遵冉有之言守周公之制什而稅一務於行古今則編戶流亡而墾田減稅計量入之數甚倍征之法納隍之懼當宁軫懷慮失三農憂深萬姓務從省約稍冀蠲除用申勤卹之懷以救惻糝之弊京兆府今年合徵八十二萬五千石

數內宜減放一十七萬五千石青苗地頭錢宜三分取一
在京諸司官員久不請俸頗聞艱辛其諸州府縣官及折
衝府官職田據苗子多少三分取一隨處糶貨市輕貨以
送上都納青苗錢庫以助均給百官

均濟職田俸料詔

京諸司官等自艱難已來不請祿料職田苗子又充軍糧
頗聞艱辛須使均濟其諸州府縣官及折衝府官職田據
苗子多少三分每年宜取一分依當處時價迴市輕貨數
內破脚差綱部領送上都納青苗錢庫其闕官職田據數

盡送仍青苗錢與本道節度觀察都防禦等使會切勾當
從今年職田並依此數徵收發遣其送物綱典計數準輕
貨綱典例處分

給復同華兩州詔

求瘼卹隱諒在憂勤罷賦省徭與之休息況因師旅供億
頗繁故孝武悔征伐之事魏文隆田租之復同華兩州百
姓等頃以賊臣背叛制在兇威淫刑以逞厚斂無度閭閻
之內杼軸其空朕肝食增懷納隍自咎將問干紀之罪遂
興無戰之師哀我斯人困於日費有牛酒壺漿之犒有資

糧扉屨之供凋殘之餘何以堪此言念彫弊豈忘優矜宜
給復二年一切蠲免放仍委刺史縣令勞徠安集庶可小
康宣示百姓使知朕意

升侍中中書令入正二品門下中書侍郎入正三

品詔

春秋以九命作上公而謂之宰臣者三公之職漢制中書
令出納詔命典司樞密侍中上殿稱制參議政事魏晉以
還益重其任職有關於公府事不係於尚書雖陳啟沃之
謀未專宰臣之稱所以委遇斯大品秩非崇至於國朝實

執其政當左輔右弼之寄總代天理物之名典領百僚陶
鎔景化豈可具瞻之命恩數不加固當進以等威副其僉
屬其侍中中書令宜升入正二品門下中書侍郎升入正
三品

欽定全唐文卷四十七目錄

代宗二

答宰臣等賀雙鵲補乾陵觀殿隙壞手詔

追諡齊王爲承天皇帝詔

給復京兆府詔

答張獻誠讓官手詔

賜李岵自盡詔

罷張增叔孫勝詔

裁減丞尉詔

答裴冕等表賀佛見光相手詔

減來年夏稅詔

答杜鴻漸辭官手詔

令州府觀察等表薦賢才詔

禁斷織造淫巧詔

答宰臣等賀文單國進象手詔

授文單國副王婆彌開府儀同三司詔

允李抱玉讓官優詔

追贈不空和尚詔

禁苑一發連二免答宰臣等請付史官手詔

停揚洪宣三州作坊詔

委觀察使安輯流亡詔

命諸道入錢備和羅詔

答郭子儀論吐蕃書手詔

分封諸王子詔

貶田承嗣永州刺史詔

許田承嗣自新詔

復田承嗣官爵詔

復田悅等官爵詔

條件內外遺闕詔

授南霽雲子承嗣歙州別駕詔

求言詔

贈楊綰司徒詔

賜楊綰諡詔

追贈張自勉實封詔

給復巴蓬等州詔

褒穆贊詔

欽定全唐文卷四十七

代宗二

答宰臣等賀雙鵲補乾陵觀殿隙缺手詔

聖祖仙都高宗園寢希夷清淨之所肅穆哀敬之地二鵲
翔集以月繫時常銜堊茨用補缺壞顧政禮之多闕而先
靈之幽助祇奉貺祐感切良深卿等道備梓材任當構厦
覩茲符應庶洽康寧實賴嘉謨弼予不逮所請編諸史冊
者依

追諡齊王爲承天皇帝詔

故齊王俊承天祚之慶保鴻名之光降志尊賢高才好學
藝文博洽智略宏通斷必知來謀皆先事識無不達理至
逾精乃者寇盜橫流疊興南幸先聖以宸扈之戀將侍君
親惟王以宗廟之重誓寧家國克協朕志載符天時立辨
羣議之非同獻五原之計中興之盛實藉奇功景命不融
早從厚宥天倫之愛震惕良深流涕追封胙於東海頃加
表飾未極哀榮夫以參舊邦再造之勤成天下一家之業
而存未峻其等歿未尊其稱非所以旌徽烈明至公也朕
以眇身纘膺大寶不及讓王之禮莫申太弟之嗣所懷靡

殫邈想逾切非常之命寵錫攸宜敬用追諡曰承天皇帝
與興信公主第十四女張氏冥婚諡曰恭順皇后有司準
式擇日冊命改葬於順陵仍祔於奉天皇帝廟同殿異室
焉

給復京兆府詔

夏后氏五十而貢殷人七十而助周人百畝而徹其稅皆
什一也故謂之天下中正而頌聲作矣乃者因三代之制
定其稅典務於行古庶以便人屬以外攘四夷歲會戎事
軍國用度公儲匱乏役費薦至近於倍征而吏或奉法不

謹失我字人之意孤惇者資有厚斂豪富者貸以輕徭動而生奸浸而流弊稅之什一其實大半致有去父母之邦供庸保之役流離逋蕩靡室可依阼於死亡而莫之省每一念至良深憫惻頃以釐改從其便安置沃墾之差寬賦斂之重今邦畿之內宿麥非稔去秋墾田又減常歲昨者徵稅其數頗多朕以萬姓不安三農將廢憂勤鬱切中夜以興思以康濟庶臻其道每欲悉免量入將惠其困而未解兵嚴猶資日費用蠲常數以卹疲人其京兆府於今年所率夏麥宜於七萬石內五萬石放不徵二萬石容至晚

田就後以雜色斛斗續納仍委京兆府尹崔昭差少尹李
椅于頎等分縣巡撫必躬必親宣示朝章令悉朕意

答張獻誠讓官手詔

獻誠早分戎閫屢建茂勲出靜漢川入司版籍傷和致疹
寢疾經時深執謙沖屢陳章表願辭右職冀及痊平嘉茲
懇誠曲遂勤請佇聞痊復當有褒昇所請者依

賜李岵自盡詔

恃衆專殺謂之亂常合族併命謂之不道按以春秋重其
責帥況自悖人理實生厲階合從棄市之論尚就議親之

典夷州流人前潁州刺史李帖幸以宗屬列於藩任政之不修亂是用長輕侮法令動搖軍州御史姚奭巡至所部其弟參於佐理諸將素有猜嫌欲加之罪不可無狀遂言使者之來事在不測俾其完聚甲兵變更將守潛䟽其意以搆禍萌而帖親自點竄詐云奭之遣墮以此疑衆因而合謀兄弟同誅宗黨咸淪胥而斃又陷數家勒兵抗威以拒所統人不堪命一方騷然頃發近臣審令按理醜圖旣露姦狀甚明薄示戒懲已從流斥詢於羣議頗屈常典朕思以道德在宥天下庶使一代之人登於仁壽之域風俗

猶薄政教不明致令長吏專此威暴無罪無辜橫分身首
冤氣慘結有傷元和惕然增懷良亦自咎期於止殺不可
措刑寬其斧鑕之誅降從盤水之禮宜賜自盡雖恩不掩
義道在無私而禮有緣情誠亦多愧王者之法敢忘至公
凡百卿士宜知朕意

罷張增叔孫勝詔

蓋議讞之道期於無刑有明罰以校其犯者有立訓以導
其迷者有捨過以舉其才者有諭旨以愧其心者在於聽
理必參而用之朝奉郎守京兆府奉先縣令賜緋魚袋張

增忝爲奉法之吏不具獄論而自專威命雖義形嫉惡而情近深文廊坊都防禦使衙前將右驍衛大將軍員外置同正員賜紫金魚袋叔孫勝不率戒訓自抵彝章恣其奮猛以至凌犯豈非惠姦縱暴者歟凡人之情各於其黨皆不能屈心引義同合至公過用此生刑用此作詢於卿士咸引正議朕以增之宰邑頗有政能惠於疲人可謂良吏勝亦久服戎事備經戰守艱虞已來累有勲績並寬以常憲惜其所長俾從罷黜用佇來效宜各解見任其叔孫勝仍付抱玉軍前驅使

裁減丞尉詔

夫計人而置官度事而賦任因時立制損益在焉吏足以理人人足以奉吏則官稱其祿祿當其秩然後上下相樂公私不匱昔漢光武時及魏太和中並減吏員兼省鄉邑致理之道此其一隅今連歲治戎天下凋瘵京師近甸煩苦尤重比屋流散念之惻然人寡吏多困於供費欲其蘇息不可得也設令廉恥守分以奉科條猶有祿廩之煩役使之弊而況貪猾縱欲而動踰典章作威以虐下厚斂以潤己者乎古者縣置大夫一員足以爲治奚必貳佐分掌

而後治耶且京畿戶口減耗大半職員如舊何以堪之豈
可以重困之人供不給之費使人不倦其在變通制事之
宜式從省便其京兆府長安萬年宜各減丞一員尉兩員
餘縣各減丞尉一員餘委吏部條件處分

答裴冕等表賀佛見光相手詔

朕嗣守鴻業恭臨寶位夕惕若厲蹈乎春冰啟三乘之真
如爲萬姓以作福大雄感應示現毫光茂對禎祥多慚薄
德卿等百辟勤修庶政休徵薦集慶慰當深所請編之史
冊宣示中外者依

減來年夏稅詔

比屬秋霖頗傷苗稼百姓種麥其數非多如聞村閭不免
流散其大歷五年夏麥所稅特宜與減常年稅

答杜鴻漸辭官手詔

卿公輔朕躬協全大化頃緣軍國務總陽和致乖涉於旬
時藥弗瞑眩屢薦章表固求歸閒謙沖再三辭志懇苦冀
遂全攝重違厥誠康復之日且有後命

令州府觀察等表薦賢才詔

内外文武官及前資官六品已下並草澤中有碩德專門

茂才異等知謀經武諷諫主文者仰所在州府觀察牧宰
精求表薦如所繇搜揚未盡遺逸林閭者即宜詣闕自舉
親當策試量能擢用

禁斷織造淫巧詔

王制命市納價以觀民之好惡布帛精粗不中數廣狹不
中量不鬻於市漢詔亦云纂組文繡害女工也朕思以恭
儉克己惇樸化人每尚素元之服庶齊金土之價而風俗
不一踰侈相高浸弊於時其來自久耗縑繒之本資錦綺
之奢異彩奇文恣其誇競今師旅未戢黎元不康豈使淫

巧之工更虧常制在外所織造大張錦硬軟瑞錦透背及大綢錦竭鑿六破已上錦獨窠文紗四尺幅及獨窠吳綾獨窠司馬綾等並宜禁斷其常行高麗白錦雜色錦及常行小文字綾錦等任依舊例造其綾錦花文所織蟠龍對鳳麒麟獅子天馬辟邪孔雀仙鶴芝草萬字雙勝及諸織造差樣文字等亦宜禁斷兩都委御史臺諸州府委本道節度觀察使切加覺察如違犯具狀奏聞

答宰臣等賀文單國進象手詔

文單遠國自古未賓能瞻八律之風來申重譯之貢君臣

入覲嬪御偕朝越海踰山輸琛獻象顧慚薄德有邁前王
此皆宗社効靈上元幽贊卿等寅亮台鼎變和神人翼致
感通無遠不屈永言輔弼慶賀良深所請付史官者依

授文單國副王婆彌開府儀同三司詔

周有越裳重譯漢有槃木獻詩遠方來儀從古所記文單
國副王婆彌慕我中朝之化方通南極之風義在撫柔禮
當加等可開府儀同三司試殿中監

允李抱玉讓官優詔

卿位重台衡勲崇師律爰加倚任兼總漢中庶展謀猷遠

寧郡邑而卿清殷退讓辭統巴岷志戀闕庭兼鎮河隴高
謝玉宇務更分憂言念至忠益堅大節永懷誠願深用慨
然覽卿表章曲遂來請

追贈不空和尚詔

大道之行同合於異相王者至理總歸於正法方化成之
齊致何儒釋之殊途故前代帝王罔不崇信法教宏闡與
時偕行特進試鴻臚卿大興善寺三藏沙門大廣智不空
我之宗師人之舟楫超詣三學坐離於見聞修持萬行常
示於化滅執律捨縛護戒爲儀繼明善教之志來受人王

之請朕在先朝早聞道要及當付囑常所歸依每每執經
內殿開法前席凭几同膠序之禮順風比崆峒之問而妙
音圓演密行內持待扣如流自涯皆悟滌除昏妄調伏魔
冤天人洗心於度門龍鬼受職於神印固以氣消災厲福
致吉祥實惟宏我之多寧止利吾之美當有命秩用伸優
禮而得師爲盛味道滋深思復強名載明前志夫妙界有
莊嚴之士內品有果地之儀本乎尚德敬順時典可開府
儀同三司仍封肅國公贈司空諡曰大辯正廣智不空三
藏和尚

禁苑一發連二兔答宰臣等請付史官手詔

帝王之制禮有三驅弧矢之威財成理道朕方欲清靜流
化無爲軌俗射御之藝闕而不書卿等援據禮經博求良
典舉聖祖岐陽之狩徵漢皇郊廟之歌再陳表章頻志簡
冊式遵彝訓宜依所請

停揚洪宣三州作坊詔

淮南數州秋夏無雨揚洪宣等三州作坊往以軍興是資
戎器旣屬時歲大歉慮乎人不寧居徵夫役工損費尤甚
務從省約以息疲人亦宜並停

委觀察使安輯流亡詔

如聞巴南道州自頃年以來其有結聚或攻陷城邑者申明
明朝旨曉諭令歸各許自新一切不問庶亦隨材敘用俾
效誠勤各復其居勉從所務展歲時伏臘之祀洽宗黨鄰
里之懽人之常情當所思慕必在長吏敦率設法安存勸
其農耕恤其疾苦如刺史縣令有能政字人民使流亡日
還戶口歲益宜委觀察使錄狀奏聞當別加超獎宣示士
庶令知朕意

命諸道入錢備和糶詔

四海之內方協大寧西戎無厭獨阻王命不可忘戰尚勞
邊事朕頃以兵革之後軍國空耗躬率節儉務勤農桑上
元儲休仍歲大稔益用多愧不知其然雖屬此人和近於
家給而邊穀未實戎備猶虛因其天時思致豐積將設平
糶以之餽軍然以中都所供內府不足粗充常入之數豈
齊倍餘之收其在方面蓋臣成茲大計共佐公家之急以
資塞下之儲每道歲有防秋兵馬其淮南四千人浙西三
千人魏博四千人昭義二千人成德三千人山南東道三
千人荆南二千人湖南三千人山南西道二千人劔南西

川三千人東川二千人鄂岳一千五百人宣歙三千人福建一千五百人其嶺南江南浙東亦合準例恐遠路往來增費各委本道節度觀察都團練等使每年取當使諸色雜錢及迴易利酒贓贖錢等每人計二十貫每道據合配防秋人數多少都計錢數市輕貨送納上都左藏庫貯以納充別勅和糶用并不得剋當軍將士衣糧充數仍以秋收送畢

答郭子儀論吐蕃書手詔

卿憂深慮遠殊沃朕心始終倚賴未可執辭也

分封諸王子詔

虞夏之制諸子䟽封漢魏以還十連授律是用錫珪班瑞
磐石開疆信通邑之紀綱爲中都之屏翰然則旌鉞之寄
推擇攸難因親之任各膺其命第四子述第五子逾第六
子連第七子迴第八子邁第十三子造第十四子暹第十
五子運第十六子遇第十七子通第十八子通第十九子
遠第二十子逸等並敏茂純懿稟於衷誠溫良孝恭形於
進退動皆合義居必有常可以理衆靖人撫封宣化而總
列城之賦繕分閭之謀克勤公家允輔王室今則均茅社

之寵盛槐庭之儀授鉞登車副茲朝典維城之固爾其懋
哉述可封睦王充嶺南節度支度營田五府經略觀察處
置等大使逾可封郴王充渭北鄜坊等州節度大使連可
封恩王韓王迥可汴宋等州節度觀察處置等大使邁可
封鄜王造可封忻王充昭義軍節度觀察處置等大使暹
可封韶王運可封嘉王遇可封端王適可封循王通可封
恭王達可封原王逸可封雅王仍並可開府儀同三司

貶田承嗣永州刺史詔

自古屈法申恩與之更始者爲君之道也務善改過期於

自新者爲臣之節也其或棄瑕含垢宏貸之澤已深而挾
僞藏奸干紀之情轉露則亦中外同棄刑憲不容西漢伏
信越之誅東京齊萌寵之罰此皆前王典式也魏博節度
支度營田觀察處置等使開府儀同三司太尉檢校尚書
左僕射同中書門下平章事兼魏州大都督長史上柱國
鴈門郡王田承嗣出自行閒策名邊戍早參戎秩效用無
庸嘗輔凶渠驅馳有素洎再平河朔歸命轅門朝廷俯念
遺黎久罹兵革自祿山肇禍瀛博流離思明繼覺趙魏堙
厄粉榆井邑靡獲安居骨肉室家不能相保全其彫瘵思

用撫寧以其先布款誠寄之爲理所以委授旄鉞之任假以方面之榮期爾知恩庶能自效崇資茂賞首冠朝倫列異姓之苴茅登上公之禮命子弟童稚皆聯臺閣之華妻妾僕媵並授國邑之號人臣之寵舉集其門將相之權兼領其職夫宰相者所以匡輔王室休庇生靈獻可替否救災恤患而乃據國家之封壤仗國家之兵戈虐國家之黎人調國家之征賦掩其資實憑竊威靈內包凶邪外示歸順陷誤良善賊害平人騁其樂禍之心俾叶同惡之體且相衛之略所管素殊而逼脅軍人使之翻潰因其驚擾便

進軍師事跡暴彰奸邪可見不然者豈志清之亂曾未崇
朝子期光朝會於明日足知先有成約指期而來是爲蔑
棄典刑擅興戈甲旣云相州騷擾隣境救災旋即更并磁
州重行威虐此實自相矛盾不究始終三州旣空遠邇驚
陷更移兵馬又赴洺州實爲暴殄不仁窮極殘忍又薛雄
乃衛州刺史固守本藩忿其不附橫加凌虐門盡屠戮無
復噍類酷烈無狀人神所冤又四州之地皆列屯營長史
屬官擅請補署精甲利器良馬勁兵全軍之資裝農藏之
積實盡收魏府迴無子遺更復收管將士闕其本部劫質

妻子給我資糧觀其所爲蓋在無赦且藏庾者平人之膏
血恣行貪竊甲兵者干城之腹心輒爲舉動欲行討問正
厥刑書猶示含容冀其遷善俾予東夏之人終免無辜之
酷抑於典憲務使慰安遂遣知古遠奉詔書喻以深旨乃
命承昭副茲麾鉞撫彼舊封而承昭又遣親將劉渾先傳
詔命承嗣逡巡磁相仍劫知古偕行先令姪悅潛扇軍吏
至使引刀自割抑令騰口相稽當衆誼囂請歸承嗣論其
奸狀足以爲憑此而可容何者爲罪今尚全其首領更授
藩條貸以朝章用遵時令其承嗣宜貶授永州刺史兼許

十歲以下一男一女隨身便路赴任委河東節度使兼御史大夫薛兼訓簡練馬步一萬五千人即赴邢州取承昭處分逐便招撫應變權宜成德軍節度使檢校左僕射竇臣精選驍雄馬步三萬二千人屯集深冀貝州等路進取幽州節度使留後兼御史大夫朱滔舉馬步軍二萬五千人進逼滄瀛權宜招討淄青等節度使檢校左僕射正己率所管馬步三萬人北臨德博淮西節度使檢校右僕射忠臣永平軍節度使兼御史大夫李勉汴宋節度使留後兼御史大夫中丞田神玉並河陽澤潞等道兵馬共六萬

五千人直據淇園皆擐甲整戈犄角相應如承嗣不時就
職尚在執迷則所在進師按於軍法今數郡之地迫受其
兵深哀士人重遭剽掠丁壯離於農畝女工廢於蠶桑胡
寧忍之蓋非獲已緬思塗炭過在朕躬其昭義軍管內五
州宜給復二年仍委承昭撫慰務使蘇息且聖人之教必
也勝殘王者之師存於止殺其魏博磁相等將士並懷忠
義皆被脅從但恐玉石俱焚當宜各思自拔除其首惡咸
與維新事定之時罪止元凶一身並其姪悅其餘官吏將
士爰及弟姪等能自歸順者皆無所問如有擒執渠魁下

其城邑便以承嗣在身官爵資財田宅一切迴賜自餘立功者節級酬賞夫軍行除害本以安人將吏所經薪芻必禁秋毫之犯律有常刑凡在師人各宜深誠於戲天地之大德時或降霜皇王之至仁亦聞用鉞顧維寡薄之理昧於授任之明以至興戎多慚黎庶布告天下令知朕懷

許田承嗣自新詔

臣子之義違而必懲春秋之辭服而先捨故武威以制其不恪文德以懷其自新田承嗣悞惑姦邪輒干紀律朝有彝憲當奉典刑猶示含容薄令降黜冀其遷悔全彼平人

不赴所貶之官再任造端之將遲迴師旅綿引旬時朕猶
憫脅從悞茲併命其人何罪顧悼增懷深思改過之期以
救無辜之禍而承嗣果能剋責頻獻誠辭泥首束身請歸
庭闕輸心瀝懇備在封章而正己地邇蕃陲具昭誠款遂
屢有陳奏達其深衷故宜宥以悔非之誠全其改往之志
翻然効順頗用嘉之即宜與子姪家口等同赴上都當待
以殊恩永守終吉豈不美歟其魏博所管官吏將士僧道
耆壽百姓等初因迫脅曾受驅馳或久抗官軍辭不獲已
或徵科郡邑出入門庭皆懼於不全蓋素非元惡既往之

咎並與維新一無所問或先在昭義軍管內諸州者並宜
却還本貫各安舊業其昭義所管官吏將士截耳軍健身
及家口先在魏博等州妄有驅迫各被質留原其初心本
非巨惡旣因詿誤先合蠲除仰即歸本州亦一切莫問各
守所務無相奪倫王典無私信存賞罰脅從罔理前聖嘉
謨歸命者必全知過者必宥今旣納承嗣之懇請亦已虛
懷捨脅從之前非悉命原免如其譎詭時日猶事逗留國
有常刑法難屢屈過期不至獲罪如初其諸道兵馬即宜
同力協心大軍剋期不可追悔轉禍爲福惟在此時至於

再三非不深切想及官吏將士已下奉而行之知朕懷也

復田承嗣官爵詔

昔在虞舜舞干羽于兩階而苗人服洎漢高帝遣陸賈宣赦南越光武亦下璽書招附竇融然則太上以德撫人其次因時制宜其或有阻兵梗化未從紀律將畏刑以紓禍俟文誥而斯懷則明恕之道宥過爲大其來久矣永州刺史前魏博等七州節度觀察處置管內支度營田等使開府儀同三司太尉檢校尚書左僕射同中書門下平章事兼魏州大都督府長史上柱國鴈門郡王食實封一千戶

田承嗣頃因封壤之外或收郡邑是以下尺一之詔徵縣
道之師貶刺零陵式彰典憲而國家十連將帥千里旌旗
車騎繼屬於山河樓船鑠結於淮海而承嗣轅門宿將方
面舊臣授鉞持衡素經委遇乃繕甲修備越河應敵然未
離魏郡嬰壘自固頻遣章奏申聞款誠懇祈革心永用遷
善又聞聚族興歎常思更新廢食遺寢沈憂成疾夫爲君
上者承天子人兼宥廣覆一夫不獲則曰時予之辜今河
南河北之人皆朕之人也豈不可念隱恤求逞其心令其
父兄乘城子弟攻取矢石之下骨肉相殘邑里之間敵讎

交斃而又兵連禍結廩餼取資暴賦急征井閭殫竭男釋
耒耜女廢蠶桑流離凍餒擠於溝壑而欲勞師黷武必舉
彝章終夕惟慮誠所未忍且使蒼生罹此塗炭皆繇朕司
牧無方非朕不德誰之過也今將損膳撤懸內省歸咎以
寬承嗣宜並復承嗣本官爵仍委在彼勾當軍州事不須
入朝弟庭琳及子姪等凡所連坐貶降者一切釋放並還
本官仍各依舊職掌驅使其魏博相衛等管內諸州各判
官兵馬使以下及州縣將吏百姓及汴宋過河將袁奉珪
祝舜并將士等並從原宥一無所問於戲以欲從人必求

諸道澤渚時禁仁有被於泉流麋卵不傷德可懷於鳥獸
今則偃戈務全兆庶以茲明誠上答天睠公卿百辟悉朕
意焉

復田悅等官爵詔

播州帶水縣百姓田悅等王者之於典刑也舉違是放聞
義則歸雖審而有常亦宥而不過況本於黜免各從親累
今與之更始宜復官常當思遷善之規載勤事上之命田
悅可依舊魏博節度中軍兵馬使銀青光祿大夫檢校右
散騎常侍兼魏州大都督府左司馬御史中丞潮州程鄉

縣尉田綰可依舊檢校尚書駕部郎中兼御史中丞柳州義章縣尉田緒可依舊試京兆府參軍萬州南浦縣尉田淪可依舊試大理評事

條件內外遺闕詔

自頃軍嚴未解政或隨時多逐權宜未歸理本宜委中書門下郎與諸司長官各舉所司內外遺闕商量釐革處置作條件聞奏俾昭宣軌度永備彝倫便俗安人典章式敘宣示中外咸使知聞

授南霽雲子承嗣歙州別駕詔

往者大盜亂華梁宋偏罹其害危城絕援析骸累月南霽
雲貞心壯節凌邁臧洪殞命敵場凜然生氣宜以其子爲
歙州別駕

求言詔

昔予太祖太宗之御天下也功格二儀不私於己化覃萬
宇猶問於人外與公卿大夫討論政典內與鴻生碩老演
暢儒風日旰忘勞時稱至理猶復旁求諫諍俯察謳謠廣
延不諱之書載建登聞之鼓於時中朝無闕政四海無疲
人歷代是遵列聖相軌朕承天序祇奉睿圖戰戰兢兢日

慎一日於茲十六年矣何嘗不勵精理道欲得忠賢虛已清心日有所待直詞讜議時或罕聞五諫七臣人其安在眷懷於此耿歎良深頃以任非其人凡事壅蔽今則已懲厥罪正乃惟心式佇嘉猷庶裨不德自今已後諫官所獻封事不限早晚任進狀來所繇門司不得輒有停滯如須側門論事亦任隨狀面奏即便令引對如有除拜不稱於職詔令不便於時法禁乖宜刑賞未當征求無節冤濫在人並宜極論得失無所迴避以稱朕意其常朝官六品已上亦宜準此其擊登聞鼓者金吾將軍收狀爲進不得輒

有損傷亦不須令人遮擁禁止其理匭使但任投匭人投表狀於匭中依常進不須勒留副本並接時妄有盤問方便止過欲使萬邦之事無隔於九重獻替之謨不遺於聽覽又自頃軍嚴未解政或隨時多逐權宜未歸理本宜委中書門下即與諸司長官各舉所司遺闕商量釐革處置作條件聞奏俾昭宣軌度永備彝倫便俗安人典章式敘宣示中外咸使知聞

贈楊綰司徒詔

王者之於大臣也存則寄其腹心均於支體參於軍國之

重敘以陰陽之和亡則誅其事功加之命數告於宗廟之
祭禋以紱冕之章則九原可歸百辟知勸故朝議大夫守
中書侍郎同中書門下平章事集賢殿崇文館大學士修
國史上柱國賜紫金魚袋楊綰性含元和身齊律度道光
雅俗器重宗彝寬柔敬恭協於九德文行忠信宏於四教
內無耳目之役以孝悌傳於家外無車服之容以真實形
於代西掖專宥密之地南宮領選舉之源以儒術首於國
庠以禮度掌於郊廟簡廉其質奉職同休頃以任非其才
毒流於政爰登清靜之輔庶諧至理之期道化既穆於朝

班儉德已行於海內雖賢人之業著於可久而夫子之命
末如之何方有憑依遽此淪謝屏予之嘆震悼良深所懷
莫從長想何及況歷官有素絲之節庀家無尺帛之餘故
飾以華袞增其法賻備膺典策載賁朝經可贈司徒

賜楊綰諡詔

裒德勸善春秋之舊章考行易名禮經之通典垂範作則
存乎格言朝議大夫中書侍郎同中書門下平章事集賢
殿崇文館大學士修國史上柱國賜紫金魚袋贈司徒楊
綰履道居貞舍和毓德行爲人紀文合典暮清而晦名無

金史卷之三
自伐之善約以師儉有不矜之謙方冊直書秩宗相禮辭
稱良史學茂醇儒委在樞衡掌茲密命彌契沃心之道累
陳造膝之誠將以布天下五行之和同君臣一德之運遽
軫藏舟之嘆未展濟川之才素業久而彌彰清風歿而可
尚自古飾終之義皆錫以美名諡法曰忠信愛人曰文平
易不懈曰簡宜諡曰文簡

追贈張自勉實封詔

頃者逆豎靈耀阻兵大梁淮西都虞候試太常卿贈揚州
大都督張自勉往觀釁焉奉議正詞無所屈撓賊臣肆忿

斃於鈇鎖朕用憫焉雖錫命之恩已旌寃宥而賞延之典爰及子孫可追贈實封五十戶

給復巴蓬等州詔

朕以黎元者君之肢體傷之則慘怛賦稅者國之衣食均之則贍濟然特圖其本先假貧人之獲安所謂富國所以底慎財用蠲省征徭期致理於太寧庶自邇而及遠如聞巴南諸州自頃年以來西有蕃夷之寇南有羌戎之聚歲會戎事城出革車子弟困於征徭父兄疲於餽餉賦益煩重人轉流亡荒田旣多頻歲仍儉戶口凋耗居民蕭然去

桑梓之重遷保山林以自活念性命於俄頃或逡巡於斂
攘傳不云乎窮斯濫矣顧其間井夫豈不懷哀哉矜人蓋
非獲已朕之不德自咎良深其巴蓬渠集壁充通開等州
宜放二年租庸及諸色徵科亦宜蠲免仍委本道觀察使
及刺史縣令切加招撫

褒穆贊詔

令子申父之冤憲臣奉君之命楚劔不衝於牛斗秦臺自
洗於塵埃

欽定全唐文卷四十八目錄

代宗三

答釋良賁表進䟽通經詔

答天長寺沙門曇邃等表定新舊兩䟽詔

褒令狐彰詔

授李泌澧朗硤團練使詔

宥李忠臣詔

遺詔

禁富戶吞併勅

卹民勅

滿限不到任處分勅

祭霍山勅

罷河中節度并耀德軍勅

準太學生徒支給廚米勅

授裴冕等集賢待制勅

遣送六祖衣鉢諭刺史楊瑊勅

命魚朝恩判國子監事勅

誅周元幹等勅

迎大覺禪師勅

停度支鹽鐵奉常使勅

減次年麥稅勅

減次年秋稅勅

諭諸道州考察所屬官勅

決杖李少良等勅

申約葬祭式勅

贈孀婆元氏潁川郡太夫人勅

命郭子儀等備邊勅

賜元載自盡勅

宥京城禁囚勅

誅裴昕勅

戒壇勅

欽定全唐文卷四十八

代宗三

答釋良賁表進疏通經詔

法師智炬高明辭峯迴秀親憑梵夾宣闡微言幽蹟真宗
演成章疏開如來之秘藏示羣有之迷津貫玉聯珠鉤深
致遠再三披閱頗謂精詳傳之招提永爲法寶也

答天長寺沙門曇邃等表定新舊兩疏詔

師等道著依經功超自覺承雪宮之旨奧爲火宅之涼颺
四分律儀三乘扁鍵須歸總會永息多門一國三公誰執

其咎初機眩曜迷復孔多爰命有司俾供資費所煩筆削
竚見裁成所謝知悉

褒令狐彰詔

中衛社稷外修疆事合於一體以靖庶邦其在有終謂之
不朽觀前代文武通賢有匡時戡難迫於大化不忘時君
未嘗不嘉尚而流歎也今有忠烈之臣彰剛直形外純和
積中本於孝敬輔以才略統制藩閫服勞王家往以母老
躬於孝養豈不戀闕以茲曠年及苴麻在艱優諭權奪踴
絕傷足淚盡喪明入覲之期良願莫遂想其風彩久軫顧

懷遠見淪沒用深追悼嗟乎方疾之時以情自疏無所有
隱見之於詞復節守常條上軍簿請擇良帥命於中朝乃
令遺允爰歸東洛教忠以報國約禮以居喪古人所謂生
不交利死不屬其子夫豈遠哉節槩誠亮高絕無隣喟然
感傷鑒寐增慟有以見東州士大夫勤王尊主之志用嘉
其休可以垂範宣付史館式昭名臣

授李泌澧朗硤團練使詔

今荆南都會粵在澧陽俾人歸厚惟賢是牧以泌文可以
化成風俗政可以全活憚爰命頒條期乎共理無薄淮

陽之守勉思渤海之功可檢校御史中丞充澧朗破團練使

宥李忠臣詔

納忠引過人臣之大節錄用念功帝王之彝典雖藩鎮之守秉律或虧而股肱之良懋勲斯在不忘求舊特用優賢淮西節度觀察處置使開府儀同三司檢校司空同中書門下平章事汴州刺史上柱國西平郡王李忠臣純性直方深衷厚實自然文武之器雅有將帥之才勇則本仁謀常制勝頃者王室多故戎事方殷奮不顧私義形於色遠

自遼海首拔全軍擁義勇之師徇邦家之急出入百戰勤勞兩河委以旌麾寄在淮右不俟駕而赴命每先期而即戎俾鎮大梁實參元輔倚賴之重中外式瞻戎部之間政刑或撓雖在危難能竭公忠戀闕勤誠載馳道路降服請罪至於再三言念勞臣良深憫歎酌於軍志失政有懲舉以朝經議勲可恕罷其方面之務省其臺閣之煩論道之司仍處三公之列分土之爵尚居五等之封用示優崇服我嘉命可檢校司空同中書門下平章事散官勲封如故朕與功臣本同休戚其於任遇豈易始終庶將傳慶子孫

寧止保其祿秩凡百卿士宜悉朕懷

遺詔

朕以眇身祇奉鴻業不能光宣大訓嘉靖萬邦奉祖宗重熙之德答公卿寅亮之勤旰食宵衣痛心疾首嗚呼天地之理死生常數疾旣大漸彌留日增惟懷永圖嗣守丕業皇太子元良繼明睿哲齊聖宜陟元后保守宗祧宜令所司當日具禮於柩前即皇帝位仍以司徒兼中書令汾陽郡王子儀攝冢宰其喪儀及山陵制度務從儉約並不得以金銀錦綵爲飾天下節度觀察團練等使刺史等並不

須赴哀祭祀之禮亦從節儉其三宮內人並宜量事減省
諸王院亦宜準此其天下人吏勅到後出臨三日皆釋服
無禁婚娶祠祀肉酒其宮殿中當臨者朝夕各十五舉音
禮固從宜喪不可久皇帝宜三日而聽政十三日小祥二
十五日大祥二十七日而釋服獲奉宗廟之靈永終天祿
所痛不得與佐命勲賢庶尹卿士顧命永訣以託萬方內
外腹心之臣文武忠良之士敬保元子以安家邦嗚呼其
聽朕命

禁富戶吞併勅

百姓田地比者多被殷富之家官吏吞併所以逃散莫不
繇茲宜委縣令切加禁止若界內自有違法當倍科責

卹民勅

浙江東西去歲旱損所出租賦頗甚艱辛今秋以來復聞
遭水百姓重困何以克堪朕所以未明求衣日旰忘食思
宏理道良用疚懷今所徵收惟正租庸而已其餘差役咸
使矜量頗亦申明冀稍安緝如聞諸道節度使不承正勅
妄有徵科州縣望風便行文牒務爲逼迫自應誅求事宜
因循轉用生弊不有懲革何以息人自今已後宜令本道

觀察及租庸使嚴加訪察其州縣除正勅支遣外不得轉承諸使文牒徵率一物已上如或有犯便仰停務具名彈奏又聞杭越閒疾疫頗甚戶有死絕未削版圖至於稅賦或無舊業田宅延及親隣言念疲人豈堪兼役致令逃散誠可哀矜亦委租庸使與本州審細勘責據實戶差遣處置訖具狀聞奏仍委刺史縣令設法招攜課最之閒褻貶斯在其有死絕家無人收葬仍令州縣埋瘞朕臨御寰瀛爲人父母一物失所每勤罪己之心四方未寧彌軫納隍之慮庶尹卿士友邦冢君宜悉朕懷共敷至理

滿限不到任處分勅

諸州府及縣令今後每有關官宜委本州府當日牒報本道觀察節度及租庸使使司具闕由附便使牒中書門下送吏部依闕準式處分其所闕官有職務重者委本府長官於見任及比司官中簡擇權令勾當正官到日停不得更差前資及白身等攝吏部及制勅所授官委中書門下及吏部甲制勅出後三日內下本州準令式計程外一月不到任本州報中書門下吏部用闕如灼然事故準勅勒留不在此限其違程人六品以下本色內殿一兩選同會

闕不成例五品以上停一二年其殿選人諸州諸使不得奏用

祭霍山勅

三代之初皆有神降監其德也天實啟之恭惟王業之初師及霍邑堅城未下大將阻兵連雨積旬糧儲不給有白衣老父忽詣軍門稱霍山之神謁大唐皇帝云東南取路八日雨止助帝破敵盡如其言巖巖霍山九州之鎮興雲致雨功已洽於生人親道輔德力更宣於王室朕纘承大寶膺受鴻休胙蠶之閒誠明可接永言幽贊茲謂有孚惟

天命神據我斯意宜令禮儀使判官司封員外郎薛頤即往霍山致祭正詞以薦稱朕意焉

罷河中節度并耀德軍勅

國中有事海內不康殲厥渠魁人自爲戰其死亡者可勝紀乎非其父兄即其子弟責實繇朕禍非自天念茲恟恟痛入骨髓明神散亂元惡就誅四胡旣平罔不相賀遂欲衣裳爲會天下偃兵備七德之武同五星之色成朕之志實惟良臣關內河東副元帥朔方河東節度使兼侍中中書令汾陽郡王子儀邁德濟時盡忠憂國切勤王之義急

偃伯之期思拯生人免其湯火善陳利害屢進封章以艱阻底寧務於清靜地非要害不可猶開幕府事無防遏不可更置轅門請停河中節度并耀德軍宜依罷茲凶器姑欲息人離散可要瘡痍可復率是道也仁遠乎哉朕心所嘉期於至理宜示中外明政體焉

準太學生徒支給廚米勅

古者設太學教胄子所以延俊造揚王庭雖年穀不登兵甲或動而俎豆之事未嘗廢焉頃年已來戎車屢駕天下轉輸公私匱竭帶甲之士所務贏糧鼓篋之徒未能仰給

由是諸生輟講經誦蔑聞宣父有言是吾憂也投戈息馬
論道尊師用宏庠序之風俾有簞瓢之樂宜令所司量追
集賢學士精加選擇使在館習業仍委度支準給厨米敦
茲儒術庶有大成甲科高懸好學者中敷求茂異稱朕意
焉

授裴冕等集賢待制勅

惟政之難非賢勿乂必稽於衆允執其中實使羣材用宏
庶績朕以國步未康朝經或闕思與文武盡臣咨謀善道
尚書左僕射裴冕右僕射郭英乂太子少傅裴遵慶太子

少保兼御史大夫白志貞太子詹事兼御史大夫臧希讓
左散騎常侍暢瓘檢校刑部尚書王昂高昂檢校工部尚
書崔渙吏部侍郎李季卿王延昌禮部侍郎賈至涇王傅
吳令瑤等並集賢待制

遣送六祖衣鉢諭刺史楊珣勅

朕夢感禪師請傳法袈裟却歸曹溪今遣鎮國大將軍劉
崇景頂戴而送朕謂之國寶卿可於本寺如法安置專令
僧衆親承宗旨者嚴加守護勿令遺墜

命魚朝恩判國子監事勅

金史卷之二十一
古者設官分土所以崇德報功總內署之綱事密於清禁
宏上庠之教德潤於鴻業賦開千乘禮序九賓必資兼濟
之能用協至公之選開府儀同三司兼右監門衛大將軍
仍知觀軍容宣慰處置使知內侍省事內飛龍閑廐使內
弓箭庫使知神策軍兵馬使上柱國馮翊郡開國公魚朝
恩溫良恭儉寬柔簡廉長才博達敏識高妙學究儒元之
祕謀窮遁甲之精百行資身一心奉上自王室多故雲雷
經始五原之北宏先啟行三河之表爰整其旅成師必勝
每合於韜鈴料敵無遺可徵於著蔡關洛既定幽燕復開

海外有截厥功惟茂歷事三聖始終竭力頃東都扈蹕釋
位勤王時當綴旒節見披棘下江助我甲令先書社稷之
衛邦家是賴及邊陲罷警戎務解嚴方獎勵於易象才兼
文武所謂勲賢亦旣任能斯焉命賞宜膺朝典式副公議
可行內侍監判國子監事充鴻臚禮賓等使封鄭國公食
邑三千戶

誅周元幹等勅

大逆不道抵夷族之誅同惡相濟當棄市之法以懲干紀
式按彝章周元幹賊臣之子兇慝成性與父階亂厥罪惟

均邵賁敢有包藏恣其悖虐怙侈滅義寇攘矯虔戮及無辜罪浮於帥宜並處極法其周元耀蔣羅漢尹元經毛崇彬李尚林等共肆醜圖同惡相濟猶捨斧鑕俾全要領其劉憲周封崔勸等同附姦邪俱行扇惑以私情蠹國議法從寬周元清年在幼沖法當配沒並準法處分朕自臨萬國思措五刑不虞兇殘有此冒犯寘以明憲期於止殺凡百卿士知朕意焉

迎大覺禪師勅

朕聞江左有蘊道禪人德性冰霜淨行林野朕虛心瞻企

渴仰懸懸有感必通國亦大慶願和尚遠降中天盡朕皈
向不違願力應物現形今遣內侍黃鳳宣旨特到詔迎速
副朕心春暄師得安否遣此不多及勅令本州供送凡到
州縣開淨院安置官吏不許謁見疲師心力弟子不算多
少聽其隨侍

停度支鹽鐵奉常使勅

唐虞之際內有百揆庶政惟和至於宗周六卿分職以倡
九牧書曰龍作納言帝命惟允詩云維仲山甫王之喉舌
皆尚書之任也雖西漢以二府分理東京以三公總務至

於領錄天下之綱綜覈萬事之要邦國善否出納之由莫
不處正於會府也令僕以綜詳朝政丞郎以彌綸國典法
天地而分四序配星辰而統五行元本於是乎在九卿之
職亦中臺之輔助小大之政多所關決自王室多難一紀
於茲東征西伐略無寧歲內外荐費徵求調發皆迫於國
計切於軍期率於權便裁之新書從事且救當時之急殊
非致理之道今外虞既平罔不率俾天時人事表裏相符
將明畫一之法大布維新之命陶甄化原去末歸本魏晉
有度支尚書校計軍國之用國朝但以郎官署領辦集有

餘時艱之後方立使額參佐既衆簿書轉煩終無宏益又失事體其度支使及關內河東山南西道劔南西川轉運常平鹽鐵等使宜停禮儀之本職在奉常往年置使因循未改有乖舊制實曠司存委太常卿自舉本職其使宜停漢朝丞相與公卿已下三日一決事帝親斷可否且國之安危不獨注於將相政之理亂固亦在於庶官尚書侍郎左右丞及九卿參領要重朕所親倚固當朝夕進見以之匡益也並宜詳校所掌具陳損益如非時宜須有奏議亦聽詣閣請對當親覽其意擇善而從朕受昊天之成命承

累聖之鴻業齊心滌慮夙夜憂勞顧以不敏不明薄於德
化致使舊章多廢至理未宏其心愧恥終食三嘆雖詔書
屢下以申振卹且朝典未舉猶深鬱悼思與百辟卿士勵
精於理俾國經王道可舉而行各宜承式以恭爾位諸州
置屯亦宜停

減次年麥稅勅

比屬秋霖頗傷苗稼百姓種麥其數非多如聞村間不免
流散來年稅麥須有優矜其大厯五年夏麥所稅特宜與
減常年稅其地總分爲兩等上等每畝稅一斗下等每畝

稅五升其荒田如能開佃者一切每畝稅二升令在必行
用明大信仍委令長宣示百姓并錄勅榜示村坊要路令
知朕意

減次年秋稅勅

頃以蕃寇猶虞王師未戢所資軍費皆出邦畿征調薦興
日加煩重念流亡之役減歲入之租務於惠養冀有蘇息
尚聞告病終未安居深用愧悼更思愛卹今關輔諸州墾
田漸廣江淮轉漕常數又加計一年之儲有大半之助其
餘他稅固可從輕其京兆來年秋稅宜分作兩等上下各

半上等每畝稅一斗下等每畝稅六升其荒田如能佃者
宜準今年十月二十九日勅一切每畝稅二升仍委京兆
尹及令長一一存撫令知朕意

諭諸道州考察所屬官勅

弛張刑政興化阜俗使吏無貪汙之跡下無愁恨之聲不
惟良二千石亦在郡主簿縣大夫親其教訓舉其綱目條
察善惡惠養困窮方伯得以考求殿最故漢置刺史臨課
郡國周制官刑糾繩邦理其義明矣朕思舉舊典以清時
俗頻詔長吏精擇此官如聞近日猶有姦濫或未習政事

素無令問因依請託尸曠祿位邪枉附法懦弱廢官人弊於下怨歸於上閭井減耗賄賂日聞豈所謂建明職守共副憂勤者也又別駕秩位頗崇若郡守廢闕掌同其任舊例補署或匪其才既不稱職則多傷害自今後別駕縣令錄事參軍有犯贓私並暗弱老耄疾患不稱其職戶口流散者並委觀察節度等使與本州刺史計會訪察聞奏與替其犯贓私者並禁身推問具狀聞奏其疾患者準式解所職老耄暗弱及無贓私才不稱職者量資考改與員外官餘官準前後勅處分其刺史不能覺察觀察節度使具

刺史名品聞奏如觀察節度管內不能勾當郎官御史出入訪察聞奏

決杖李少良等勅

李少良韋頌等兇險悖戾反常逆理恣其讒說將構禍階離間君臣矯誣中外醜圖姦狀按驗皆明殿中侍御史陸珽幸忝清憲之職仍參儒館之侍交結非類包藏不測豈有周行之列容此二兇跡旣同惡法當均罪並宜付京兆府各決重杖一頓朕每以君子小人貌同心異必先觀行然後察言豈茲譖譱能迴聽斷夫招賢納諫君之體也獻

直盡規臣之節也朕仄席思理佇聞政道豈謂姦邪兇慝
紊我彝倫須別是非用分涇渭再加詳鞠能正刑典凡百
在位宜悉朕懷

申約葬祭式勅

葬祭之儀古有葬範頃來或踰法度侈費尤多自今以後
宜儉約悉依令不得於街衢致祭及假造花果禽獸並金
銀平脫寶鈿等物並宜禁斷

贈孀婆元氏潁川郡太夫人勅

古者緣情立禮著慈母之制蓋聖人示德無不報之禮而

漢宣帝亦追錄掖庭郡邸嘗有阿保之勤以功深淺並授封賞記於前典歷代是之故嬭婆元氏朕在襁褓受其撫育推乾就濕慈愛特深可謂仁人厚惠茂德者矣可贈潁川郡太夫人

命郭子儀等備邊勅

自古聖帝明王之臨御也莫不法乾坤之覆載體山川之受納立德於太上還淳於至道清淨無事保合太和濟於羣生洽於四海豈垂意兵革勞心戰爭也蓋有德化之所不綏招懷之所未諭不式王命毒流生人故有除暴禁淫

之師安人止戈之武則神農黃帝堯舜禹湯之所不免也
朕君臨萬邦十有三載薄德內愧中夜再興至如易簡寬
仁恭默元淡素懷所慕終食豈忘然自承統已來屬當多
難伊川有盜國之孽朔野有叛君之將江湖海島伏戎數
輩其在右武安能解嚴所以請於宗廟親授經略誅詰姦
宄摧殄暴強三年之閒方內底定此皆皇天佑我烈祖羣
后戴予一人是用集大勲於國家保萬姓於區夏豈伊寡
薄能及此邪每思偃兵姑務柔遠將息馬以論道期舞干
而修德而西戎負約閒歲犯邊朕嘗棄細過庶宏大體疆

臣兵吏亟請長驅屢有誠勅不令掩襲兼約游騎不許擒生或誤得之亦使還遣固以亭育之義豈隔華戎綏撫之恩寧殊遠邇故布文告以訓之敘舅甥以睦之彼亦嘗遣聘臣來修舊好玉帛之禮纔至於上國烽燧之候已及於近郊長其無厭昧於事大去冬踰我關隴入我邠邠驅人之馬牛掠人之士女朕許其通好本在安人乘此不虞翻貽我詐每一興念悼於厥心豈朕不叶於親鄰豈朕有負於恩信猶期懲艾未忍討除今大閱甲兵以增扞禦且宏不戰之道用舉備邊之常所以然者念其載勤款䟽求繼

嘉姻事或由衷義從割愛因之寧遠豈復顧私當罷四方之師永全二國之好儻更侵冒必示威刑宜令子儀以上郡北地四塞五原義渠稽胡鮮卑雜種馬步五萬衆嚴會拘邑克壯舊軍抱玉以晉之高都韓之上黨河湟義從汧隴少年凡三萬衆橫絕高壁斜界連營馬璘以西域前庭車師後部兼廣武之戎下蔡之徭凡三萬衆據於朝那遏當路之塞忠臣以盧龍柳城洎右北平漢東諸鎮江黃申息之師凡三萬衆屯於回中張大軍之援忠誠以武落別校右地寄鋒凡三萬衆出岐陽而北會希讓以三輔太常

之徒六郡良家之子自渭上而西合汴宋淄清河陽幽薊
總四萬衆分列前後魏博成德昭義永平總六萬衆大舒
左右朕內整禁旅親誓諸將資以千金之費錫以六牧之
馬戎裝戰器軍用邊儲各有司存素皆精辦咨爾將相文
武宣力之臣夫師克在和善戰不陣各宜保據經界屯處
要衝斥堠惟明首尾相應若能悔過何必勞人如或不然
自當伐罪然後眷求統一以制諸部進取之宜俟於後命
各敬爾守無黷武經賞罰之科國有明典宣示中外知朕
意焉

賜元載自盡勅

任直去邪懸於帝典獎善懲惡急於時政和鼎之寄匪易
其人中書侍郎同中書門下平章事元載性頗姦回跡非
正直寵待踰分早踐鈞衡亮弼之功未能經邦成務挾邪
之志常以罔上面欺陰託妖巫夜行解禱用圖非望庶追
典章納受贓私貿鬻官秩兇妻忍害暴子侵牟曾不隄防
恣其凌虐行僻辭矯心狠貌恭使沈抑之流無因自達賞
罰差謬罔不由茲頃以君臣之間重於去就冀其遷善掩
而不言曾無悔非彌益兇戾年序滋遠釁惡貫盈將肅政

於朝班俾申明於憲網宜賜自盡朕涉道猶淺知人不明
理績未彰遺闕斯衆致茲刑辟憫媿良深儻勉行之務申
沮勸凡在中外悉朕懷焉

宥京城禁囚勅

頃屬煩暑差候憊陽積旬處於高明之中猶有鬱蒸之歎
而況幽閉獄戶辨對官曹俯臨秋期將正時憲重修欽恤
之道載宏全宥之仁其京城見禁囚犯流已下罪並宜釋
放

誅裴昕勅

自古制刑殺人者死法不可緩斷之則行裴昕頃在軍幕
遂知留務內懷私忿敢蓄兇謀曾無罪名專殺良將憲司
鞫問款占明白密邇京師擅行威戮宜付京兆府集衆決
殺

戒壇勅

戒分律儀釋門宏範用申獎導俾廣勝因允在嚴持煩於
申謝